



Inuit Ataqatigiit Inatsisartuni

Nuuk, 30. august 2007

Inatsisartut suleriaasianni § 36 imm 1 naapertorlugu Naalackersuisunut apeqquq imaattoq matumuuna saqqummiuppakka:

Qaanaami Mittarfiup siunissami atorluarneruneqarnissaanut piorsarneqarnissaanullu Naalackersuisut qanoq pilersaaruteqarpat - mittarfiup nunanit allanit tikinneqarsinnaanissaanut mittarfiullu atortuutitigut tank-eqarneq ilanngullugu pitsaanerusumik periarfissaqalernissaanut Naalackersuisut qanoq iliuuseqarniarpat?

(Inatsisartunut ilaasortaq Agathe Fontain, Inuit Ataqatigiit)

Tunnqavilersuut:

Upernariartornerani Qaanaami inuttut ajornartorsiutit salliutillugit inuiaqatigiinni naalackersuinermillu suliaqartunit allaallumi Danmarkimi oqallisigineqarput. Inuttut ajornartorsiutit anigorniarnissaannut periarfissanik innuttaasullu siunissami Qaanaami inuussutissarsiornikkut ineriartuutaasunik Naalackersuisut tigussaasumik tikkuussinngillat.

Inuussutissarsiutit ineriartornissaannut ingammik allanut naleqqiutissagaanni taama avingarusimatisumit angallannikkut periarfissat isiginngitsoorneqarsinnaanngillat. Maannamullu ukioq kaajallalugu Qaanaamut Qaanaamillu attaveqarnissamut mittarfik periarfissatuaavoq.

Mittarfiup inuussutissarsiutitigut atorneqarsinnaaneranut Qaanaami eqqaanilu nioqqutissiat, soorlu aalisakkanit immamilu miluumasunit nioqqutissiat, assartorneqarsinnaanerat pitsaasumik periarfissaqartinneqartariaqarpoq.

Taamatuttaa q takornarnianit, ilisimatuunit inuussutissarsiortunillu allanit aamma Avanaarsuata nunanit tamanit soqutiginerulerneqarnerani, soorlu Amerikap nunavissuanit, Qaanaap tikinneqarsinnaanissaanut pitsaasumik periarfissiisoqartariaqartoq.

Mittarfik Qaanaami sananeqalermat pilersaarutaasimagaluarpoq timmisartunut orsussaasivik 300.000 liter-iussasoq, kisiannili tank-eq ataaseq 100.000 literi sipaarutigineqarsimalluni, taamaasiluni mittarfik taamaallaat orsussaasiveqarluni massakut 200.000 literimik imaqarsinnaasumik. Taannalu tank-eq sipaarutaanikoq inissaliorneqareersimagaluarluni tanke-tassaali amigaataaginnarluni.

200.000 liter-iinnarmillu timmisartunut orsussasiveqarnerup kingunerivaa ukiut tamarluinnaasa timmisartunut orsussamik amigaateqalernerup kingunerisaanik orsussamik tunisisinnaajunnaartarneq, taamaasiluni timmisartut tikittussarpaaluit nunanit allaneersut annaaneqartarlutik. Tamatumalu aamma kingunerivaa aningasatigut isertitassaraluit annaaneqartarnerat. Taamaalilluni aalajangersimasumik timmisartuussisarnerit aamma inuinnaat timmisartukkut angalasarnerat orsussakillisaarnikkut pinngitsoortinneqartarput.